

29 JUN 1999

LID-PENGESAHAN

TUJUH KETUA KERAJAAN SAHKAN KEHADIRAN DLM DIALOG LANGKAWI

PUTRAJAYA, 29 Jun (Bernama) -- Tujuh daripada lapan ketua kerajaan telah mengesahkan kehadiran mereka bagi Dialog Antarabangsa Langkawi (LID) keempat yang akan diadakan di pulau peranginan itu daripada 25 hingga 28 Julai ini.

Mereka adalah Presiden Festus G Mogae dari Botswana, Perdana Menteri Dr Pakalitha Bethuel Mosisilli dari Lesotho, Dr Sam Nujomo dari Namibia, Presiden France Albert Rene dari Seychelles, Presiden Omar Hassan Ahmad Al-Bashir dari Sudan, King Mswati 111 dari Swaziland dan Presiden Robert Mugabe dari Zimbabwe.

Sementara itu, Presiden Cassam Uteem dari Mauritius belum mengesahkan kehadirannya.

Tema tahun ini adalah "Menguruskan Pemulihan Ekonomi Bagi Kemakmuran Bersama - Pendekatan Perkongsian Bijak," kata Tan Sri Dr Omar Abdul Rahman, pengerusi bersama Kumpulan-Industri Malaysia Bagi Teknologi Tinggi (MIGHT).

Dr Omar, yang juga konvenor bersama bagi LID '99, berkata Perdana Menteri Datuk Seri Dr Mahathir Mohamad akan merasmikan LID '99, yang dijangka dihadiri lebih 250 peserta daripada kedua-dua sektor kerajaan dan swasta.

Telekom Malaysia adalah penaja utama bagi acara itu, katanya kepada persidangan akhbar di sini.

Beliau juga berkata daripada maklum balas yang diterima, pemimpin-pemimpin tersebut berminat untuk mengetahui bagaimana Malaysia menangani krisis ekonomi tanpa menggugat rangka sosio-ekonomi.

Beliau berkata terdapat pengajaran yang harus dipelajari daripada perbezaan antara negara terjejas yang berada di bawah penyeliaan Tabung Kewangan Antarabangsa (IMF) dengan negara yang melaksanakan langkah-langkah pemulihan mereka sendiri.

Dr Omar berkata pemimpin-pemimpin tersebut juga menyuarakan keluhan iaitu ketika agensi pelbagai hala itu berterusan menggesa mereka menangani krisis ekonomi, mereka tidak menyatakan kepada negara-negara itu bagaimana untuk menguruskannya.

Tidak seperti dialog sebelum ini, LID '99 akan menyelidiki isu-isu khusus berkaitan dengan pemulihan ekonomi dan kemungkinan mengkaji pendekatan seimbang dalam menangani masalah itu.

LID '99 dianjurkan bersama oleh MIGHT dan Perkongsian Komanwel bagi Pengurusan Teknologi (CPTM) yang berpangkalan di London.

-- BERNAMA

MR ZK OS